

MALAYSIA
DEWAN NEGARA
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI ISNIN, 4 DISEMBER 2023, PUKUL 10.00 PAGI

Bil. 29

PERTANYAAN-PERTANYAAN BAGI JAWAB LISAN

1. PN-1523-L09952
Dato Dr. Nuing Jeluing minta **PERDANA MENTERI** menyatakan apakah reformasi institusi yang telah dilaksanakan setakat ini selaras dengan konsep Malaysia MADANI.
2. PN-1523-L10192
Dato' Sri Vell Paari A/L Tun Samy Vellu minta **MENTERI KEWANGAN** menyatakan jumlah sebenar dalam Belanjawan 2024 yang diperuntukkan khas untuk masyarakat India dan bolehkah jumlah peruntukan ini dinaikkan oleh Kerajaan melalui belanjawan yang telah diperuntukkan untuk perkara lain dan bagaimana perkara ini boleh dilaksanakan.
3. PN-1523-L10072
Tuan Seruandi bin Saad minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kementerian mempertimbangkan untuk meningkatkan elaun kepada sukarelawan Program Khidmat Bantu Di Rumah (KBDR) buat warga emas dan Orang Kurang Upaya (OKU) dan berapakah jumlah sukarelawan yang terlibat pada masa ini.
4. PN-1523-L09890
Datuk Haji Aziz bin Ariffin minta **MENTERI PENDIDIKAN TINGGI** menyatakan status pencapaian Kerajaan dalam menarik minat pelajar asing bagi mengikuti kursus-kursus di Universiti Awam (UA) dan Institusi Pengajian Tinggi Swasta (IPTS) serta menjadikan Malaysia sebagai hab pendidikan serantau.

5. PN-1523-L10015
Datuk Mohd Hisamudin bin Yahaya minta **MENTERI PERLADANGAN DAN KOMODITI** menyatakan apakah pelan tindakan Kerajaan untuk menstabilkan harga getah yang telah mencengkam pekebun-pekebun kecil sejak sekian lama dan adakah Kerajaan berhasrat untuk menaikkan harga getah bagi membantu pekebun kecil keluar dari paras kemiskinan.
6. PN-1523-L09880
Datuk Wira Koh Nai Kwong minta **MENTERI SAINS, TEKNOLOGI DAN INOVASI** menyatakan status dan impak daripada pemantauan oleh Kementerian terhadap sebarang peningkatan paras radioaktif di perairan negara berikutan pelepasan air radioaktif yang dirawat daripada loji nuklear Fukushima ke Lautan Pasifik oleh Jepun yang menimbulkan kebimbangan rakyat.
7. PN-1523-L09910
Datuk Seri Hajah Zurainah binti Musa minta **MENTERI PEMBANGUNAN USAHAWAN DAN KOPERASI** menyatakan :-
 - (a) semua inisiatif yang sedang dilaksanakan untuk membantu usahawan mikro di semua Kementerian dan agensi dan bagaimanakah perkara ini sedang dikoordinasi supaya tiada pertindihan usahawan yang meraih manfaat; dan
 - (b) adakah terdapat pemantauan terhadap keberkesanan inisiatif ini dari segi memastikan usahawan mikro menjadi usahawan kecil.
8. PN-1523-L09899
Datuk Seri Prof. Emeritus Dr. Awang bin Sariyan minta **MENTERI KOMUNIKASI DAN DIGITAL** menyatakan :-
 - (a) rancangan Kerajaan dalam pengembangan industri kreatif tanah air, termasuk pemanfaatan Kecerdasan Buatan (AI); dan
 - (b) langkah yang diambil oleh Kerajaan untuk memastikan nilai dan budaya setempat tidak terabai kerana sehingga kini tiada sebarang mekanisme kawalan Kecerdasan Buatan (AI) daripada segi nilai agama ataupun sosiobudaya.
9. PN-1523-L10464
Dr. Wan Martina binti Wan Yusoff minta **MENTERI EKONOMI** menyatakan sejauh manakah kejayaan pelaksanaan Inisiatif Pendapatan Rakyat (IPR), program kesejahteraan rakyat dan pembasmian kemiskinan serta berapakah peratusan daripada kumpulan sasar ini yang telah dapat keluar daripada miskin tegar terutamanya di Kelantan.

10. PN-1523-L09998
Datuk Wira Dr. Mohd Hatta bin Md Ramli minta **MENTERI PERDAGANGAN DALAM NEGERI DAN KOS SARA HIDUP** menyatakan adakah Kementerian telah melakukan kajian forensik untuk mengenal pasti punca berlakunya episod kekurangan bekalan keperluan asas seperti bekalan beras, minyak masak dan juga gula di pasaran tempatan sejak pentadbiran Kerajaan menerajui Putrajaya.
11. PN-1523-L10291
Tuan Mohd Hasbie bin Muda minta **MENTERI KEWANGAN** menyatakan usaha Kerajaan untuk memastikan Kumpulan Wang Persaraan (Diperbadankan) [KWAP] mencapai tahap mandiri memandangkan dividen yang mampu dibayar oleh KWAP kepada Kerajaan pada tahun hadapan dijangka hanya RM3 billion berbanding RM31 billion untuk bayaran persaraan.
12. PN-1523-L10400
Dato' Sivaraj A/L Chandran minta **MENTERI KESIHATAN** menyatakan :-
- (a) apakah langkah yang dilakukan Kementerian untuk mengurangkan tekanan kerja dan kestabilan mental kakitangan kesihatan seperti doktor dan jururawat; dan
 - (b) apakah pandangan Kementerian tentang cadangan daripada Persatuan Perubatan Malaysia (MMA) untuk meneliti semula bayaran elaun *on call* bagi doktor perubatan kerana jumlah bayaran mengikut jam adalah lebih rendah berbanding pekerjaan lain.
13. PN-1523-L09846
Datuk Razali bin Idris minta **MENTERI BELIA DAN SUKAN** menyatakan jumlah lulusan diploma graduan Institut Kemahiran Tinggi Belia Negara (IKTBN) yang melanjutkan pendidikan di peringkat sarjana muda di universiti awam sejak tahun 2018 sehingga sekarang.
14. PN-1523-L09861
Datuk Teo Eng Tee @ Teo Kok Chee minta **MENTERI PEMBANGUNAN USAHAWAN DAN KOPERASI** menyatakan pelan tindakan Kerajaan dalam memberi galakan kepada usahawan bukan Bumiputera yang berada dalam sektor industri kecil dan sederhana (IKS).

15. PN-1523-L09971
Datuk John Ambrose minta **PERDANA MENTERI** menyatakan apakah langkah-langkah yang diambil untuk meningkatkan penglibatan golongan bukan Bumiputera dalam perkhidmatan awam agar ia mencerminkan demografi kaum di Malaysia.
16. PN-1523-L10332
Datuk Lim Pay Hen minta **MENTERI KESIHATAN** menyatakan langkah yang diambil oleh Kerajaan untuk menangani kenaikan kos perkhidmatan kesihatan terutamanya kos ubat-ubatan akibat daripada kejatuhan nilai Ringgit agar hal ini tidak menjejaskan orang ramai khususnya golongan B40 yang perlu mendapatkan rawatan di hospital awam.
17. PN-1523-L10437
Dato' Dr. Nelson A/L Renganathan minta **MENTERI SUMBER MANUSIA** menyatakan adakah kuota pelajar di institusi Pendidikan dan Latihan Teknikal dan Vokasional (TVET) di bawah kelolaan Kementerian telah diisi dengan sepenuhnya dan jika tidak, berapakah jumlah kekosongan yang sedia ada yang boleh ditawarkan semula, serta kursus-kursus yang terlibat.
18. PN-1523-L10000
Tuan Manolan bin Mohamad minta **MENTERI PERLADANGAN DAN KOMODITI** menyatakan adakah Kerajaan bercadang untuk membenarkan pengeksportan kayu gaharu dan tongkat ali.
19. PN-1523-L10254
Dato' Shamsuddin bin Haji Abd Ghaffar minta **MENTERI KEMAJUAN DESA DAN WILAYAH** menyatakan apakah langkah-langkah yang diambil oleh Kerajaan bagi meningkatkan pendapatan penduduk luar bandar supaya mereka boleh keluar daripada kitaran kemiskinan.
20. PN-1523-L10318
Tuan Jaziri Alkaf Abdillah Suffian minta **MENTERI KESIHATAN** menyatakan status mengenai pemberian autonomi kesihatan kepada Kerajaan Negeri Sabah dan Sarawak memandangkan pemberian kuasa pentadbiran untuk sektor pendidikan dan kesihatan di Sabah serta Sarawak terutamanya pengambilan petugas merupakan antara perkara penting yang sedang dibincangkan oleh Kerajaan Persekutuan melalui Sekretariat Perjanjian Malaysia 1963 (MA63).

21. PN-1523-L10432

Datuk Haji Mustafa bin Musa minta **MENTERI PEMBANGUNAN KERAJAAN TEMPATAN** menyatakan :-

- (a) jumlah peruntukan bagi menyelenggara dan menaik taraf landskap seni taman, alatan permainan dan kawasan riadah di seluruh kawasan Pihak Berkuasa Tempatan (PBT) di Melaka pada tahun 2024; dan
- (b) bagaimanakah Kerajaan dapat memastikan keadaan taman, alatan permainan dan kawasan riadah awam terpelihara dan terhindar daripada aktiviti vandalisme.

22. PN-1523-L10263

Tan Sri Dato' Low Kian Chuan minta **MENTERI KESIHATAN** menyatakan adakah Kerajaan berhasrat untuk mengembangkan penggunaan aplikasi MySejahtera bagi merangkumi perkhidmatan agensi Kerajaan yang lain seperti pelaksanaan subsidi bersasar.

23. PN-1523-L10127

Datuk Noraini binti Idris minta **MENTERI KOMUNIKASI DAN DIGITAL** menyatakan kawasan-kawasan luar bandar di negeri Sabah yang akan mendapat manfaat daripada perluasan capaian jalur lebar 5G yang berkelajuan tinggi dan apakah status terkini pemasangan peranti Starlink yang dikatakan akan diperhebatkan pemasangannya di negeri tersebut.

24. PN-1523-L10392

Datuk Paul Igai minta **MENTERI LUAR NEGERI** menyatakan bilangan Duta Besar Malaysia dan Pesuruhjaya Tinggi yang dilantik daripada perkhidmatan awam, politik dan lain-lain mengikut negeri dan jantina.

25. PN-1523-L10566

Tuan Musoddak bin Ahmad minta **PERDANA MENTERI** menyatakan peranan Pusat Respons Scam Kebangsaan (NSRC) dalam melindungi golongan warga emas daripada berterusan menjadi mangsa panggilan penipuan dalam talian.

26. PN-1523-L10128

Dato' Sri Ti Lian Ker minta **MENTERI PERPADUAN NEGARA** menyatakan langkah penambahbaikan Kerajaan dalam melestarikan perpaduan dengan meningkatkan pengetahuan, kefahaman dan penghayatan masyarakat pelbagai kaum mengenai khazanah warisan negara seiring dengan perkembangan teknologi terkini.

27. PN-1523-L10489
Tuan Haji Hussin bin Ismail minta **MENTERI PERTANIAN DAN KETERJAMINAN MAKANAN** menyatakan jumlah stok simpanan beras negara dan statistik berdasarkan kategori daripada sumber tempatan atau import.
28. PN-1523-L10211
Datuk Seri Dr. Mujahid bin Yusof minta **PERDANA MENTERI** menyatakan bilakah satu Suruhanjaya Reformasi Undang-undang akan diaktakan.
29. PN-1523-L10342
Dato' Ajis bin Sitin minta **MENTERI KEMAJUAN DESA DAN WILAYAH** menyatakan :-
- (a) jumlah dan keluasan perkampungan Orang Asli di seluruh negara yang masih belum diwartakan sebagai tanah rizab Orang Asli di bawah Akta Orang Asli 1954 [Akta 134]; dan
 - (b) jumlah peruntukan yang diperlukan untuk menyelesaikan kerja-kerja ukur perkampungan Orang Asli tersebut.
30. PN-1523-L10019
Datuk Bobbey Bin Suan minta **MENTERI LUAR NEGERI** menyatakan kekangan yang dihadapi oleh Kerajaan untuk menyahrahsaikan perjanjian sempadan maritim Malaysia-Indonesia yang ditandatangani baru-baru ini.
31. PN-1523-L10621
Dato' Kesavadas A/L A.Achyuthan Nair minta **MENTERI PERTANIAN DAN KETERJAMINAN MAKANAN** menyatakan langkah-langkah progresif yang sedang dilaksanakan menerusi sokongan Lembaga Pemasaran Pertanian Persekutuan (FAMA) dalam memperkasakan sektor penternakan ayam dan lembu di seluruh negara bagi menghadapi sebarang ketidaktentuan permintaan dalam pasaran tempatan yang boleh mendorong kepada kebergantungan negara terhadap daging ayam dan lembu import.
32. PN-1523-L10032
Datuk Wira Dr. Mohd Hatta bin Md Ramli minta **MENTERI EKONOMI** menyatakan rancangan Kementerian berkaitan potensi-potensi yang dapat dibangunkan dalam sektor *high-growth high-value* (HGHV) di setiap wilayah koridor ekonomi.

33. PN-1523-L10524
Datuk Dr. Dominic Lau Hoe Chai minta **MENTERI PERTANIAN DAN KETERJAMINAN MAKANAN** menyatakan apakah usaha yang dilakukan oleh Kementerian bagi meningkatkan pengeluaran makanan dalam negara dan juga kadar simpanan stok (*stockpile*) selaras dengan strategi utama Dasar Sekuriti Makanan Negara 2021-2025.
34. PN-1523-L10050
Dr. Lingeshwaran A/L Dato' Seri R. Arunasalam minta **MENTERI PEMBANGUNAN WANITA, KELUARGA DAN MASYARAKAT** menyatakan sama ada Kerajaan mempunyai hasrat untuk menubuhkan TASKA yang beroperasi selama 24 jam untuk penjawat awam kerana terdapat banyak perkhidmatan penting yang beroperasi selama 24 jam seperti perkhidmatan kesihatan, polis, imigresen, bomba dan sebagainya.
35. PN-1523-L10086
Tan Sri Datuk Seri Panglima Anifah Bin Aman minta **MENTERI PENGANGKUTAN** menyatakan apakah program dan berapa peruntukan yang diberikan bagi menaik taraf sistem pengangkutan awam di bandar-bandar utama di Sabah dan Wilayah Persekutuan Labuan.
36. PN-1523-L10545
Tuan Haji Abdul Nasir bin Haji Idris minta **MENTERI PERTANIAN DAN KETERJAMINAN MAKANAN** menyatakan langkah-langkah yang diambil oleh Kerajaan supaya tidak berlaku kenaikan harga ayam mentah apabila subsidi ayam ditarik balik.
37. PN-1523-L09854
Datuk Razali bin Idris minta **PERDANA MENTERI** menyatakan sejauh manakah kebenaran Malaysia sebagai ibu pejabat *scammer* berdasarkan laporan Kementerian Kewangan mengenai kerugian akibat penipuan dalam talian dari 2019 hingga Mei 2023 yang berjumlah RM 2.6 bilion.
38. PN-1523-L10478
Dr. Wan Martina binti Wan Yusoff minta **MENTERI EKONOMI** menyatakan adakah Kerajaan bercadang agar peruntukan kepada negeri-negeri yang ketinggalan dalam pembangunan diberikan hak sama rata sebagaimana negeri-negeri membangun yang lain.

39. PN-1523-L09978

Tuan Manolan bin Mohamad minta **PERDANA MENTERI** menyatakan apakah status Jawatankuasa Khas Kabinet Mengenai Hak Tanah Orang Asal/Asli (JKKHTOA) yang dipersetujui Jemaah Menteri pada 03hb Jun 2015 iaitu hasil daripada Laporan SUHAKAM.

40. PN-1523-L10556

Tuan Haji Abdul Nasir bin Haji Idris minta **MENTERI EKONOMI** menyatakan sejauh manakah penerimaan rakyat terhadap mekanisme Kerajaan bagi membantu golongan miskin melalui program Inisiatif Pendapatan Rakyat.

41. PN-1523-L10137

Datin Ros Suryati binti Alang minta **MENTERI KEWANGAN** menyatakan pelan dan kos yang terlibat untuk penggantian kereta Kerajaan kepada kenderaan elektrik dan proses perolehan yang akan dilaksanakan.

42. PN-1523-L10361

Dato' Ahmad bin Dato' Sri Hj. Ibrahim minta **MENTERI PERDAGANGAN DALAM NEGERI DAN KOS SARA HIDUP** menyatakan :-

- (a) apakah langkah-langkah yang diambil Kementerian dalam menangani masalah manipulasi harga oleh semua kedai makan dan medan selera memandangkan kebanyakan penjual makanan nasi campur tidak mempunyai tanda harga; dan
- (b) adakah Kementerian bercadang untuk mewujudkan kempen Op Menu supaya tiada diskriminasi dan manipulasi harga terhadap rakyat.

43. PN-1523-L09930

Dato' Dr. Ahmad Azam bin Hamzah minta **MENTERI KOMUNIKASI DAN DIGITAL** menyatakan statistik mengenai kesan negatif penggunaan media sosial seperti ketagihan, kecanduan, kemurungan atau penggunaan berlebihan dalam kalangan remaja di Malaysia dan apakah usaha Kerajaan bagi membendung keadaan ini.

44. PN-1523-L10408

Dato' Sivaraj A/L Chandran minta **MENTERI BELIA DAN SUKAN** menyatakan apakah pelan strategik pihak Kementerian untuk membangunkan *eSport* di Malaysia terutamanya dengan mengambil kira kedudukan sukan ini sebagai antara yang memberi pelbagai manfaat kepada para penggiat industri digital dan kejayaan pasukan Malaysia yang berjaya memenangi pingat perak dalam acara tersebut di dalam Sukan SEA Phnom Penh, Kemboja 2023 baru-baru ini.

45. PN-1523-L10261
Dato' (Dr.) Arman Azha bin Abu Hanifah minta **MENTERI PEMBANGUNAN KERAJAAN TEMPATAN** menyatakan apakah usaha dan perancangan jangka panjang Kerajaan dalam mengawal harga rumah yang kelihatan tidak selari dengan purata pendapatan rakyat pada masa sekarang ekoran kenaikan kos sara hidup, Kadar Dasar Semalaman (OPR) yang tidak menentu dan kadar percukaian yang lain.
46. PN-1523-L10509
Dato' Haji Husain bin Awang minta **MENTERI EKONOMI** menyatakan inisiatif Kerajaan untuk membantu pembangunan infrastruktur dan penyaluran dana pembangunan untuk negeri di Pantai Timur khususnya Terengganu bagi mengurangkan jurang pembangunan antara negeri-negeri di Malaysia.
47. PN-1523-L10368
Tuan Roderick Wong Siew Lead minta **MENTERI PERTANIAN DAN KETERJAMINAN MAKANAN** menyatakan perkembangan terkini mengenai permohonan menaik taraf Pasar Tamu Sentral Sarikei serta jumlah kos yang terlibat.
48. PN-1523-L10517
Dato' Haji Husain bin Awang minta **MENTERI BELIA DAN SUKAN** menyatakan mekanisme yang diguna pakai oleh Kementerian dalam memperkasakan program pembangunan atlet para di peringkat akar umbi bagi memastikan kesinambungan kejayaan kontinjen negara untuk menghadapi Sukan Paralimpik Paris 2024.
49. PN-1523-L10280
Tuan Jaziri Alkaf Abdillah Suffian minta **MENTERI PENDIDIKAN** menyatakan bagaimanakah Kerajaan mengukur keberkesanan program pendidikan sains, teknologi, kejuruteraan dan matematik (STEM) yang diterapkan kepada pelajar sekolah menengah.
50. PN-1523-L10465
Tuan Nik Mohamad Abduh bin Nik Abdul Aziz minta **MENTERI PERTAHANAN** menyatakan berapakah perbelanjaan pasukan Batalion Malaysia (Malbatt) 850-11 di Lubnan dan apakah jaminan kebajikan kepada ahli keluarga semasa melaksanakan misi di luar negara.

51. PN-1523-L10180
Dato' Sri Vell Paari A/L Tun Samy Vellu minta **MENTERI PENDIDIKAN** menyatakan adakah Kerajaan Negeri boleh memperkenalkan peperiksaan yang berbeza daripada apa yang telah ditetapkan oleh Kementerian.
52. PN-1523-L09959
Datuk John Ambrose minta **MENTERI PENGANGKUTAN** menyatakan perancangan segera Kementerian untuk menaik taraf kemudahan di Lapangan Terbang Antarabangsa Kota Kinabalu (KKIA), Lapangan Terbang Tawau dan Lapangan Terbang Sandakan memandangkan ketibaan pelancong antarabangsa dan domestik semakin tinggi di Sabah.
53. PN-1523-L10313
Datuk Lim Pay Hen minta **MENTERI SUMBER MANUSIA** menyatakan sejauh manakah inisiatif yang dilaksanakan oleh Sime Darby Plantation pada awal tahun ini yang menawarkan gaji RM3,000 bagi pekerja sektor perladangan dan menyasarkan 100 peratus pengambilan pekerja tempatan telah disambut baik oleh para warganegara dan apakah usaha yang dilakukan oleh Kementerian bagi memastikan lebih banyak sektor swasta menyertai usaha ini.
54. PN-1523-L10215
Tan Sri Haji Mohamad Fatmi bin Che Salleh minta **MENTERI PENDIDIKAN** menyatakan sebarang mekanisme baharu bagi mengatasi isu kegagalan murid untuk menguasai subjek Bahasa Melayu dan Bahasa Inggeris khususnya di luar bandar.
55. PN-1523-L10066
Dr. Lingeshwaran A/L Dato' Seri R. Arunasalam minta **PERDANA MENTERI** menyatakan :-
(a) bilangan penjawat awam yang memohon pertukaran keluar negeri dan masih menunggu kelulusan; dan
(b) perancangan Jabatan Perkhidmatan Awam (JPA) untuk mengurangkan bilangan penjawat awam yang menunggu pertukaran keluar negeri termasuk mewujudkan sistem pertukaran suka sama suka bagi gred dan jawatan yang sama.
56. PN-1523-L10110
Datuk Noraini binti Idris minta **MENTERI KESIHATAN** menyatakan :-
(a) bilangan klinik bergerak yang sedia ada di Sabah sehingga kini dan adakah ianya memenuhi keperluan sedia ada; dan

- (b) perancangan Kementerian bagi menambah bilangan klinik bergerak berkenaan.
57. PN-1523-L10196
Dato' Juhanis binti Abd Aziz minta **MENTERI PENDIDIKAN TINGGI** menyatakan bilangan kemasukan pelajar ke Universiti Awam (UA) lepasan Sijil Pelajaran Malaysia (SPM) dari tahun 2019 hingga sekarang dan bagaimana Kerajaan memastikan pelajar lepasan SPM terus menyambung pelajaran mereka ke tahap yang lebih tinggi.
58. PN-1523-L09826
Tuan Abun Sui Anyit minta **MENTERI PERLADANGAN DAN KOMODITI** menyatakan adakah Kementerian bersedia untuk menyerahkan tanah ladang kelapa sawit di bawah pemilikan Kerajaan Persekutuan bagi memberi laluan kepada Kerajaan Sarawak untuk melaksanakan projek-projek penanaman padi ke arah menjadikan Sarawak sebagai jelapang padi negara pada masa hadapan.
59. PN-1523-L10538
Prof. Tan Sri Datuk Dr. Hj. Mohamed Haniffa bin Hj. Abdullah minta **MENTERI SUMBER MANUSIA** menyatakan :-
- (a) statistik jurang kemahiran mengikut keperluan semasa serta ramalan keperluan masa hadapan mengikut negeri; dan
- (b) apakah strategi semasa Kementerian untuk mengatasi jurang ini ke arah pendekatan yang mengutamakan kemahiran atau "*a skills-first approach*".
60. PN-1523-L09922
Datuk Seri Hajah Zurainah binti Musa minta **MENTERI PENDIDIKAN** menyatakan sama ada terdapat sebarang inisiatif khusus yang dilakukan oleh Kementerian dalam menjaga kesihatan mental para murid terutamanya untuk calon peperiksaan besar seperti Sijil Pelajaran Malaysia (SPM) dan adakah Kementerian boleh mempertimbangkan inisiatif yang khusus kepada pelajar dalam tempoh beberapa minggu atau bulan sebelum musim peperiksaan bermula.
61. PN-1523-L10233
Tan Sri Haji Mohamad Fatmi bin Che Salleh minta **MENTERI KEWANGAN** menyatakan status semasa pengoperasian bank digital di seluruh negara dan cadangan untuk menambah baik inisiatif tersebut serta sejauh manakah manfaatnya terhadap rakyat dan negara.

62. PN-1523-L10612

Dato' Kesavadas A/L A.Achyuthan Nair minta **MENTERI KEMAJUAN DESA DAN WILAYAH** menyatakan :-

- (a) ukuran petunjuk prestasi utama (KPI) yang dilaksanakan dalam era Malaysia MADANI terhadap mutu penyampaian pendidikan di setiap Maktab Rendah Sains MARA (MRSM); dan
- (b) adakah Kementerian akan mempertimbangkan pelaksanaan kuota khas bagi pengambilan pelajar bukan Bumiputera daripada keluarga miskin tegar di MRSM tertentu.

63. PN-1523-L10418

Puan Noorita binti Sual minta **MENTERI KESIHATAN** menyatakan jumlah pemohon lelaki bagi jawatan Jururawat terlatih dan jumlah yang berjaya diterima masuk ke pusat latihan serta berkerja di Hospital Kerajaan :-

- (a) apakah wujud kesaksamaan dalam pemilihan calon Jururawat lelaki melalui Suruhanjaya Perkhidmatan Awam tanpa berlakunya diskriminasi; dan
- (b) adakah sebarang langkah yang diambil untuk mempromosikan kerjaya Jururawat lelaki agar dapat disebarluaskan di seluruh Malaysia.

64. PN-1523-L10343

Dato' Ahmad bin Dato' Sri Hj. Ibrahim minta **MENTERI KOMUNIKASI DAN DIGITAL** menyatakan apakah punca kekurangan penggiat seni yang memohon Dana Kandungan Digital (DKD) MyCreative di Sarawak dan apakah usaha Kementerian untuk menghebahkan dana tersebut supaya disebar dengan lebih meluas dalam media sosial.

65. PN-1523-L10249

Tan Sri Dato' Low Kian Chuan minta **MENTERI KEWANGAN** menyatakan :-

- (a) langkah-langkah yang akan diambil oleh Kerajaan untuk mengukuhkan nilai Ringgit Malaysia; dan
- (b) adakah Bank Negara Malaysia akan menetapkan peratusan penukaran pendapatan eksport (*export proceeds*) kepada Ringgit Malaysia dan juga memendekkan tempoh masa penghantaran pulang pendapatan eksport dari tempoh enam bulan.

ATURAN URUSAN MESYUARAT DAN USUL-USUL

- | | | | |
|----|-----------------|---|--------------------------|
| 1. | (D.R.31/2023) | Rang Undang-Undang Perbekalan 2024 -
Menyambung semula Perbahasan atas masalah “Bahawa Rang Undang-undang ini dibacakan kali kedua sekarang”.

(30 November 2023)

[Menteri Kewangan] | Bacaan Kali Kedua |
| 2. | (D.R.36/2023) | Rang Undang-Undang Kewangan (No.2) 2023

[Menteri Kewangan] | Bacaan Kali Kedua |
| 3. | (D.R.33/2023) | Rang Undang-Undang Syarikat (Pindaan) 2023

[Menteri Perdagangan Dalam Negeri dan Kos Sara Hidup] | Bacaan Kali Kedua |
| 4. | (D.R.40/2023) | Rang Undang-Undang Suruhanjaya Hak Asasi Manusia Malaysia (Pindaan) 2023

[Menteri di JPM (Undang-undang dan Reformasi Institusi)] | Bacaan Kali Kedua |
| 5. | (D.R.42/2023) | Rang Undang-Undang Kawalan Produk Merokok Demi Kesihatan Awam 2023

[Menteri Kesihatan] | Bacaan Kali Kedua |
| 6. | (D.R.26/2023) | Rang Undang-Undang Makanan (Pindaan) 2023

[Menteri Kesihatan] | Bacaan Kali Kedua |
| 7. | (D.R.28/2023) | Rang Undang-Undang Kecekapan dan Konservasi Tenaga 2023

[Menteri Sumber Asli, Alam Sekitar dan Perubahan Iklim] | Bacaan Kali Kedua |
| 8. | (D.R.29/2023) | Rang Undang-Undang Bekalan Elektrik (Pindaan) 2023

[Menteri Sumber Asli, Alam Sekitar dan Perubahan Iklim] | Bacaan Kali Kedua |

9. **Usul dibuat oleh Menteri Ekonomi dan masalah dicadangkan :-**

"(a) **BAHAWA** Dewan ini,

memahami akan perlunya satu dasar untuk mereformasi pasaran kerja melalui Kertas Putih Cadangan Dasar Gaji Progresif agar golongan pekerja mendapat gaji yang lebih tinggi seiring dengan peningkatan produktiviti.

mendukung aspirasi Kerajaan untuk menstruktur ekonomi ke arah Malaysia sebagai sebuah negara berpendapatan tinggi dengan memperkenalkan dasar gaji yang dijangka berupaya mengurangkan ketidaksamarataan pendapatan, meningkatkan produktiviti pekerja dan daya saing syarikat.

menyokong usaha pelaksanaan Dasar Gaji Progresif yang akan dimulakan dengan projek rintis bagi menentukan keberkesanan dan ketersediaan sebelum pelaksanaan Dasar Gaji Progresif dibuat secara menyeluruh; dan

menyeru semua pihak berkepentingan untuk bersama-sama memikul tanggungjawab dalam menjayakan usaha ini sejajar dengan pendekatan kolektif dengan semua pihak termasuk Kerajaan, majikan dan pekerja.

(b) **BAHAWA** dalam meluluskan Kertas Putih Cadangan Dasar Gaji Progresif supaya menjadi hala tuju reformasi pasaran kerja negara seperti yang dinyatakan dalam Kertas Perintah CMD.69 Tahun 2023 iaitu Kertas Putih Cadangan Dasar Gaji Progresif."

[Menteri Ekonomi]

**RISALAT-RISALAT YANG DIBAWA KE DALAM MESYUARAT
(DEWAN NEGARA)**

TAHUN
2023

RISALAT/DOKUMEN

TARIKH
DIBENTANGKAN

CMD. 69 Kertas Putih Cadangan Dasar Gaji Progresif

4 Disember 2023